

四庫全書

集部

欽定四庫全書

集部

養蒙文集卷十九

詳校官中書臣閔思毅

主事臣呂雲棟覆勘

總校官進士臣繆琪

校對官中書臣王瑣

謄錄監生臣藍嘉璐

欽定四庫全書

養蒙文集卷九

元 張伯淳 撰

七言律

壽右平章

經濟規模本六經
紫微垣下泰階明
一身長繫國元氣
萬事元從心太平
此日槐庭賓席滿
經旬葭琯穉陽生
道中自有乾坤在
歲序推遷品物亨

愛日如春樂歲豐佳時心事與天通蒼生福澤令狐相
苦節清修司馬公曾見繫麟呈綉紱底須放鵠祝金籠
請賡聖主賢臣頌四海熙熙壽域中

壽梁叅政

唐有梁公柱石臣白雲飛處每思親爭如政瑟均調日
長奉安輿一笑春慶事沓來聞好語新陽此去恰盈旬
請賡壽域洪鈞句不羨莊周指大椿

壽馬右丞

圖書四壁是生涯
勲業身名玉不瑕
右轄留躔吳分野
左弧呈瑞魯儒家
鹽梅異好難為味
桃李無言自有花
願為東南民力計
莫將霖雨換烟霞

印鎮黃金退食餘
清風苔逕履痕踈
頗容都下登門客
時對窓前挿架書
天送綵衣娛宴會
春融花氣滿庭除
更看壽域開天下
歲歲歌謠二月初

壽周僉省

江浙三年二品官
東南民力一分寬
已傳北闕除書近

且對西湖戲綵歡赤舄衮衣留宦譜朱顏綠鬢立朝端
年年燕子來時節花下壺觴慶夜闌

壽張右丞

戶外鞭韉莫敢前朝回圖史日周旋位登右轄班行峻
身荷東宮委任專春意偏于天上早月華長似夜來圓
吾宗遠邁晉宗衮翊贊皇家億萬年

壽楊威卿

當年旌節尚垂芳江浙重來姓字香解遶同堂金鼎味

共推行省紫微郎天生經濟風猷雅節近中和春晝長
從此八荒開壽域倘容退士借餘光

壽田大使

攬轡重來浙水濱綉衣增壯舊精神共談二十年前事
又祝八千春裡人靜看槐陰移晚照預斟蒲酒對芳晨
永霜雨露隨時見四海熙熙壽域民

壽何叅政

疋馬新從舊隱來紫微垣下逼三台進難退易平生操

並畜兼收公輔才管領早春歸鼎鴈流連明月伴尊壘
萬錢日用非公志四海從今壽域開

壽董承旨

年開八袞步如飛清白傳家世所希寶帶疊紋新寵渥
玉顰增飾舊朝衣此時汗簡提綱重後日春花挿帽歸
且把野莊圖卷却鰲扉咫尺是黃扉

壽何右丞

循環甲子纔周日際會元貞第一春天啓皇圖新景運

時游廊廟舊儒臣結來桃實踰千歲此去花朝恰兩旬
向日勲名皆分內願開壽域納斯民

壽陳北山學士

共事知君意味真八磚晴日易為春還朝猶帶庭萱喜
分壽長逢歲籥新寵疊官袍唐禁從祥開綉紱魯儒臣
雁行出處雖云異家慶年年鶴髮親

壽董中丞

左轄當時位不虛錢塘回首十年餘重來更覺襟期好

相見何妨履迹疎
歲晚江空風力勁
冰凝雪重土膏舒
崆峒日月汾陽老
總在庭槐種德初

壽何平章

當代耆英柱石臣
廟堂高議起經綸
生辰恰慰中書老
半月纔開上國春
搢笏垂紳關德量
飲冰食蘗出天真
須知桃李無言意
丹桂叢中拱大椿

壽東崖

去年曾祝詞垣壽
恰占新元兩日前
今歲尚為京國客

又瞻瑞彩五雲邊
班行天上星辰近
節操歲寒松栢堅
底用北方南極老
本來太乙照青編

壽靜得

日上天衢治象明
兩朝開濟足勲名
笑嚔每為民休戚
去住深關國重輕
玉樹芝蘭陰德種
蒼松翠栢歲寒情
明年此日江南路
遙望三台寄頌聲

壽王中齊就次所賡韻

臨風標格玉壺寒
自昔相期大耐官
炯炯使星隨境換

悠悠人海覺天寬
萊公生旦中元近
魏國修名晚節看
更有當家佳話在
碧蓮池色照仙壇

壽唐樂山

占得中秋三日前
嫩涼庭戶納嬋娟
玉堂未至燕鴻裡
寶署清班雨露邊
宦路閒忙誰可必
人生才德此為全
樂山自有靜中壽
何假莊椿歲八千

壽吳閒閒

悟徹南華第二篇
從容自得本神全
典刑有韻傳書出

綱紀更新教法傳
壽酒霜天思對菊
玄門陸地計開蓮
黃鍾漸應陽生候
愛日添長近御筵

壽張松軒

客裏論文千載餘
是翁矍鑠祇如初
同時交口推前輩
暮景娛情在古書
花底朝回家慶集
松間晝永俗緣疎
年年記取懸弧日
二月堦棠一葉舒

壽金尹

小春消息到花封
天為中年駐魯恭
七葉蟬冠家譜盛

雙飛鳬鳥宦情濃排冬喜氣催綸詔闔境歡聲溢酒鐘
久遠功名還分內底須托物指春松

次蔡復齋韻

昔年辛苦映螢囊振挾相期千仞岡往事轉頭如逝水
浮生隨處是吾鄉相逢栢馬情文厚更覺蓴鱸氣味香
一笑出門烟水濶輕舟卧聽雨浪浪

送盛魯山赴廣西廉訪副使

清臺參錯用儒臣公以南儒入選掄瀕海得州曾最績

去天遠處儘疲民金章紫綬皇華使大帶深衣名教身
萬里行行驅瘴霧滿庭榕葉四時春

送鄧行父無為教授

向年東浙班荆數彼此公餘拂塵絲今日西淮呼棹往
溪中深處著臯比人生聚首雲萍似客路驚心歲月遲
天地久長功業富鄧林杞梓看他時

次韻雪澗兄

閒中睡覺日窓紅生看庭花轉影重千里風郵啣棗萼

一篇雲錦被蒿蓬身疑夢裡同清境喜到眉間展碧峯
賢者是凡愚者弟頗開心廣尚顏童

送王廷用

滿城風雨怕催租賴有諸賢素望孚農邑載頒新號令
毘陵猶頌舊規模江山入眼馬蹄疾南北關情雁影孤
客裏不堪斟別酒夢隨流水到西湖

送王士能赴衢州同知

客裏陽關首重回爛柯山下好風催纔從國子先生出

曾是分司御史來郡境歡迎新五馬家聲留得舊三槐
東南民力年來竭對此薰絃播阜財

寄焦達卿

別後蹉跎白髮侵關情日暮碧雲深諸公飽挹湖山趣
倦客銷殘鐵石心身世百年渾是夢交游四海要知音
浙間久雨傷農否自古陽明可勝陰

送王臣卿御史

三槐堂下接芳塵收斂風霜滿坐春口角新詩追老杜

篋中古刻出先秦縱知湖海襟期別況是芝蘭氣味真
極目江空歲年晚典刑還屬老成人

送顧東圃

鄉校年來未易支玲瓏八面此心期一廬宜得能官譽
垂去還如始至時芹泮又看雲路直枌陰不趣月舟移
斯文留取春長在玄圃崑崙景更奇

送白湛淵赴太平

白傅風流照汗青耳孫早歲以詩鳴謾資微祿培清選

共喜斯文見太平采石江頭醒舊夢凌歊臺上攪吟情
我今南邁君東上一笑出門秋氣清

次東厓錢塘留別韻

八磚聲價擅三長扛鼎從知筆力強孤館秋風重對語
長檠夜雨幾高張新愁飛逐湖山夢舊句留為篋笥光
趁取菊花螃蟹月不論醒醉且持觴

客裏方知白日長可人清話意差強菊花晚節秋九月
柳絮浮雲琴一張時到鈴齋忘世慮歸來寒壁借隣光

待君尋得新篋酒盡把離愁付此觴

送蔣栢心

又駕南轅指去途懸知柳淡已梅疎江湖到處推耆舊
吳越為隣等里問六籍百家談麈裏千巖萬壑客羶餘
東州朋友如相問為說神交不以書

與杜公

魯邸經年計轉賒由來痼疾已烟霞無能空蠹侏儒粟
有用多慚藝術家萬里客途歌鵲月二分春事付鶯花

杜公善斷輝唐史餘論何妨借齒牙

與郝叅政

京華邂逅各歡然似結三生石上緣執政大臣經濟暇
集賢學士笑談邊羨君夜雨添情話老我春風攪客眠
傾蓋白頭他日見且將心事托詩篇

送董僉院

家傳相譜出詩書經緯全才世所無笑指鳳臺尋鶴料
却從鷗閣轉鴻樞野花橋畔清時好細柳營中素望孚

送客江南雲日薄夢隨流水到松榆

送徐雲山

幾度家山入夢驚
美君秋思滿歸程
自天優詔增儒重
此日寒韁較昔榮
五桂竟芳椿未老
二川擇勝水同清
東西相望曾何遠
回首三年客帝城

題張氏積善堂

累世同居公藝忍
見金不取幼安廉
古今為善宜求報
造物虧盈每益謙
春滿蘭堦無限好
年侵蕉境有餘甜

堂成更許門高大還得天家雨露霑

送尹國賓赴財賦總管

古號江淮財賦淵唐人此語似虛傳
提綱振領看今日竭澤焚林難往年
長樂思濃君遠越陽關歌散我留燕
馬閒倘及花時去湖上風光共畫船

送林德隱

同年君是早歸人多羨乾坤自在身
客舍歌殘朝雨後扁舟興盡雪溪濱
淵明入社何妨酒摩詰懷鄉祇為親

金匱要略
卷九
若會東州諸故舊莫將羊酪配羹蓴

寒食

春雨松楸望眼賒春城楊柳舞腰斜
四千里地江南客百五風光陌上車
兒為歸遲稀遣信僕多愠見苦思家
公餘少慰淒涼意蓓蕾一庭紅杏花

題冀郎中需軒

為郎非速亦非遲世上從渠疾走兒
取義雲天闊遠業放懷風月付新詩
橫飛直上初何力既往方來各有時

我亦頗知消息理玉堂茅舍等南枝

次韻安副使送行

相逢幾度醉流霞紅葉怕聽蘓幕遮行李知君將屈道
虛舟偏我未還家傳來天上芝催檢歸去霜餘菊上花
樂是新知愁是別他時佳話亦堪誇

送呂仁溥簿尉

太平歌頌起毫端萬里歸來識量寬不出修門膺再命
雖云矮屋有漁官吾鄉正及蓴鱸美此意還將栢馬看

親舊相逢須問訊莫因所易不知難

洪同僉座上次韻

萬里同晴八月秋耆英想像洛中游相逢筆底翻三峽
共說人間有十洲舞袖卷回雲又過禁鐘催散月還留
將詩酌酒吾何敢早已輸公第一籌

東山泉隱

客裡相逢意倍親別時曾記柳眉顰君南我北分殊轍
暑往寒來又小春山在東邊留晚照泉于清處隱吟身

從今可踐西湖約共買扁舟載幅巾

呈右平章

客中歲月等駒陰霜雪緣愁鬢影侵小草可慚非遠志
焦桐何意得知音事於民便行須力思恐人知感自深
陸氏一莊荒到了但存松栢歲寒心

送馬性齋

為儒作相早投閒回首舊遊真險灘苦節清脩天自定
急流勇退古為難暫將綠野酬裴度終恐蒼生望謝安

我亦春風一桃李夕陽幾度倚欄杆

送江東谷奉母南歸

五千里外賦融融倫紀情深性所鍾
龐儉得翁佳話在壽昌念母異鄉逢
去來曾記遼東鶴離合休誇劍浦龍
薄俗聞風深可愧汗青舍此復何從

題高唐王萬卷堂

龍飛朝會藹簪裳曾向詞林望景光
維翰豈同周列土宗儒復見漢宗王
金章盤綬羣公表玉軸牙籤萬卷堂

頌語自憐才思劣但能想像賦高堂

送張可與叅政

堂堂政地趣公歸猶及和鸞未駕時不日可承三接寵
此官已較十年遲朝廷每向才中選江浙應添去後思
一動兩酬忠孝志肯同兒女別離悲

寄柳老

旅食京華兩載同錢塘邂逅苦匆匆曾將漫刺投鈴下
又報危檣過浙東天濶雲飛俱暮景雪凝冰冱易春風

金定四庫全書
卷九
關情總在闌干曲明月雙溪徙倚中

張御史

青驄小駐古餘杭似為名山發舊藏瑞世皆知為鸞鷟
鋤姦只合問豺狼六橋風月文書暇萬壑雲烟翰墨香
顧我同庚又同姓款門相對說閒忙

次韻桂軒宣慰

出山何事忽登畿越得年年好景時象緯光芒依北極
陽春消息到南枝訪尋老桂慚無暇踏破晴苔賸有詩

邂逅他鄉良可喜此心應許歲寒知

寄吳博文

別來冀北欲空羣無復橋邊待博文
豈是室家為已累自緣衣袂有時分
醺酸蚋聚終傷味木腐蟲生謾解紛
相與寸心如雪月窓前梅發倍思君

次韻游憲二首

白頭不改締交時變態從渠薄俗漓
榮木關情何采采山苗滿眼自離離
遂初老我今猶健招隱從公計已遲

遙想山城風月好出塵高致未為卑

玉堂客我綴行間史筆何堪企二班
塵染衾裯良自笑雪侵髭鬢不禁刪
蓬窓雖陋堪容膝菊徑猶存粗解顏
出處行藏還在我底須倦翼始知還

題范氏所得平江李總管舊藏文正公書伯夷頌
長白山中名相出首陽山下若人賢古今如此能多少
歲月相望越二千遺墨來從新畫戟故家復取舊青氊
偉哉君子無窮澤留得餘芳百世傳

送郭耕道還京

心在修門夢欲飛不知行色為誰遲
曾聞藥籠儲材久應動宸旒側席思
別恨已隨楊柳絮歸程正及藕花時
若將康濟規模論自昔惟稱相與醫

賀良輔得孫

五倫竟夕幾徘徊一旦家庭笑語回
乍屏岐黃為子喜俄聞孔釋送孫來
詩書一脈泉方達枝葉單傳花賸開
玉雪可人應衮衮衣冠盛事付庭槐

謝右丞下訪

古道輕身下匹夫，鳴騶深巷止傳呼。
僕于相國傲何敢，時則維摩病未甦。
海納川容知雅量，天開地闢有真儒。
魯齋心印親傳得，願借微言為砭愚。

送徐廉訪

宇宙聲名日月長，四方上下每相望。
乞身始遂登龍願，未面曾聞薦鶚章。
完取璧歸看晚節，賣將劍去有甘棠。
午橋暫得清吟暇，夢裡西湖歛澹光。

送張彥高之宜興

與翁契誼久相親有子舉比坐上人此日絲綸來北闕
向年閥閱派西秦冷官當暑氈還暖舊學綠州扁更新
回首家庭才一水問安常得寄書頻

送張子仁

氣誼過從眼倍明客中別酒若為傾三年政府能無謂
一道賓筵定有聲魚稻羨君遊處樂鱸膾發我故鄉情
邊民所貴寬民力官府於今號太平

賈氏望梅樓

寂寞千巖萬壑秋欲窮望眼更登樓曾觀海者難為水
自出山來無此遊前代衣冠隨世運故園草木染春愁
重門深閉閒庭院難掩當年富貴羞

次韻辭年憲招

契濶重逢寂寞賓相看霜鬢兩陳人鷄聲猶記五更月
羊酪何如千里尊此去款門還有日不須把酒苦留春
過從肯負秋冬約蒙彼松楸省二親

送范文赴無錫教授

江湖猶誦藹莊名有子青衫拜寵榮
衿佩歡迎新博士
塤篪相重兩難兄
惠泉茗供公餘樂
泮水詩脾分外清
寄語德齋賢太守
好將廣廈納儒生

送趙橘隱過嚴陵

少傅親傳有殿中
當年蘭茁舊家風
近來轉覺江湖窄
此去應求氣味同
鵲樹無依嗟月冷
燕簾重卷趁泥融
人生百計閒中好
莫負灘頭老釣翁

拱北樓

縹緲樓臺十二闌，舉頭人在鳳池班。
天風不隔尋常眼，辰極長依咫尺顏。
更點分明關政事，規模雄麗壓江山。
東南民物瞻堯日，乞得餘光萬里還。

贈趙治中

要教嶺海瘴塵清，膽氣凌空身可輕。
北闕肆頒溫詔語，南州欣見老書生。
馬卿諭蜀惟傳檄，裴相平淮不血兵。
論賞雲中雖未竟，秋香晚節是功名。

題賈都事母夫人詩卷

德備三從著義方艱難世故早更嘗克家嚴似巴寡婦
有子賢于漢望郎官路冰霜堅蘼蓀天朝雨露到萱堂
起居曾記回班例娛奉朱顏白日長

劉文質母八十

人生富貴有時得家慶檀栾自古稀四子承顏聯棣萼
諸孫繞膝奉萱闈隣封指日看森戟母訓當年記斷機
從此壽齡加百倍大椿還可答春輝

題耶律公慶九十詩卷

簪笏名家奕葉傳一經賸有子孫賢
掉頭榮刺宜多福屈指期頤尚十年
絳縣老人神算衍集賢學士綵衣鮮
秋風堂上瞻家慶笑指莊椿頌八千

寄王廉訪過於潛

漠漠江空歲晚時山城古道轡如絲
埽清蠹穴求民瘼珍重傳家作吏師
花縣豈無潘令譜筠軒重和老坡詩
襟塵萬斛憑誰洗把筆臨風寄所思

贈王元帥

奇絕曾聞海外遊，瘴鄉安適等中州。
六韜三畧傳書出，二廣重湖宦轍周。
唐將來從元帥府，杜陵吟到岳陽樓。
公餘莫恨登臨少，民瘼須將念慮求。

寄司性之

別來況味復何如，欲寄相思不暇書。
當日提綱儒學事，祇今分席廣文居。
闕情湖上風光處，極目江東日暮餘。
聞道桐川多故舊，此行為計未全疎。

送鄭盤隱

驛柳枯條尚可攀由今視昨兩蒼顏十年玉署如錐脫
七品緋袍當錦還目斷飛鴻仍客館夢隨歸騎即鄉關
沿途漸近梅消息去去臨民轉不閒

題布薩夫人詩卷

蚤從夫子事戎官三十年來巴蜀間
間範有人為內則藁砧無計可生還
植萱致養難留景更石為塋不動山
旌表在門傳在子他時彤史尚班班

送宣使赴省

百里棲遲別駕才好風飛下鶴書催扁舟揚子江頭去
雙鳥禦兒溪上來驛路相望秋月照邦人專待使星回
臨歧不作陽關想聊寫心期付酒杯

次韻

客中歲晚正天寒幾度行藏獨倚闌窓眼奏竿風借隙
簷牙間玉雪留殘同門合志成三益剪燭論文美二難
空作孤山香影夢此君相對祇蒼官

上按察使沙卜珠仲清

夾道歡迎御史驄平反心事與天道共稱官府刑無濫
更喜儒家道未窮天下庇寒惟廣廈人間執熱有清風
書生不作依憑想願托詩情冷淡中

寄王桐廬

昔日班聯文字官重逢未覺舊盟寒不求花縣弦歌樂
聊奉萱堂菽水歡異政倚看馴雉樹高風猶想釣魚竿
東南民力年來竭凡事當于窄處寬

送潛江南

湖學諸生得範模
棹頭金穀近人無
盡心不願名歸已
衛道惟憂沒及儒
山澤一寒侵暮景
風霜萬里指亨衢
中朝諸老如相問
為說年來病轉癯

送張從之臺郎

又報天邊好語催
烏臺移近鳳凰臺
幙中頗見此客否
江左喧傳某掾來
到處冰霜凝簡牘
公餘風月入尊罍
他人不似吾同姓
歌出陽關首重回

送卜外郎

當年琴調響嚴灘墨綬歸來盍鴈冠
猶借文章資幙辦還教風采振臺端
清明官府光華遠佳麗江山境界寬
別後相思何處在故園花竹日平安

送張孝先

萬人海裏得吾宗傾蓋論文冷淡中
快覩冰壺映寒露又催霧鬣趁秋風
鳳凰悞喜臺如昨猿鶴才知帳已空
折柳津頭重回首暮雲碧處是江東

送王中丞

學海波源識老龍
人生聚散苦匆匆
愛閒易得過從懶
臨別還將姓氏通
白簡絳騶凌曉色
空城故國鎖秋風
當家官譜傳江左
勲業憑高指顧中

送王御史

客裏忘形是笑歌
西風吹恨落庭柯
不禁遠別情懷惡
況是中年感慨多
熟路馬蹄偏馭踏
舊時笏角轉嵯峨
從今側耳朝陽鳳
時借餘輝到澗阿

送王子慶承省委過東浙

等閒乘傳一何忙
整頓輿圖上職方
天氣轉添行色好
秋花猶似舊時香
百年事蹟多沿革
七郡人情有否臧
歷覽歸來江路冷
載將奇石壓輕航

送趙壽卿赴廣西書吏

客中尊酒足清歡
驄馬驚飛白鷺閒
向上儘多清步武
極南更有好溪山
扁舟桂海冰天處
健筆紅蓮綠水間
人到中年偏惜別
不禁對雨聽陽關

送燕僉省

度越拘攣到鳳池
片言曾結九重知
紫薇垣底新僉署
玉筍班中舊羽儀
歸袞獨酬平日志
離觴長記小春時
君家蓮漏銘猶濕
平治規模更屬誰

送劉光裔

客裏相逢意味投
自憐無地可依劉
及民不問官高下
奉檄難從我去留
春事已隨流水逝
湖光未卜幾時遊
悠悠千里共明月
別後相思付倚樓

送趙懷玉

倚門白髮望悠悠全壁言歸古冀州喜色不緣毛義檄
壯心欲效子長遊幾年湖海滋吟筆萬里風霜入敝裘
臨別莫為兒女語琴書滿載更何求

次韻伯成

竟日消閒學少年草深門巷盡翛然天邊忽委文光照
几上空留墨色鮮恨欠買羊同醉酒懸知騎馬似乘船
何時並轡春風裡界破蘇隄柳外烟

次韻馬德昌

臨風我欲駕輕輶先借人間十日秋但願偷閒延歲月
誰能觸熱闖王侯門無俗跡塵如掃衣得新涼汗不流
想見襟懷同此快未輸太一汎蓮舟

送吳博文赴平江學正

知君水到自成渠最喜華宗恰在吳孟氏誨人先已正
淵明逐祿為飢驅交遊隨處春風滿契濶關情夜月孤
我輩中年偏惜別時看雁影落平蕪

送潘尉

卷藏黃綬賦閒居百里爭攀少府車老去雅懷輕出處
生來道眼識來除柳隨風轉絲難繫花待春深氣更舒
禦水松江同一葦勤勤別後故人書

次韻羅蛻軒

從來朝市總囂塵但作乾坤一散人野草閒花從滿地
白衣蒼狗付浮雲辛勤愧我為謀拙剥啄知君得句新
相見不須談許事雨中呼酒且論文

次韻曹山長二首

未能忘祿從三仕應悟浮榮等六如不向賈區陳寶貨
特尋理窟貯琴書清聲麈尾從容際樂意皋比誦說餘
自是冷官能破熱卜隣况自仲尼居

匆匆又報趣裝回小徑難施逸驥才青草窻前隨意好
桃花觀裡幾時來利名莫問尤超卓人已相忘孰忌猜
畢竟本來珍貴在胷中玉笋與瓊杯

送元美維揚省親

輕航一葦即家庭肯效尋常兒女情相見便須談實用
此行不是為虛名關心淮水雲逾白回首西湖水自清
我有欲言言不盡倚樓時數往來程

送王耕存使日本

要將談笑息兵端此舉能為世所難數日南風傳號令
一時東海識衣冠人言蘇武持旄去我作康公買磬看
名遂願公身早退送行不特勸加餐

次韻葉亦愚

堦染苔痕履跡疎底須更著絕交書雖無隙地栽花竹
幸免傍人窘室廬隣燭肯容身衣被詩筒多謝意勤渠
翻思杭秀相望日徒有空函問起居

何大使

出處由來不自期公于養志動無違半生毛櫟非營進
萬里潘輿又賦歸浙水載將秋月滿天城自在白雲飛
野人一見還輕別轉眼秋高隼更威

次韻陳介軒

遠地高人未易招，傾心學海百川朝。
誰開士庇千間厦，身絕軍聲半夜潮。
閉戶不將秋葉埽，開渠漸覺土花消。
羨君家慶圖中樂，此去相從諒匪遙。

送李仲常運使

從來足國在寬民，公是江南有脚春。
自古宣無鹽鐵使，祇今政待老成人。
風帆回首湖山遠，天仗催班雨露新。
是處芳題華匾在，不將謠頌托堅珉。

題楊墳

為求閒曠訪雲林觸目亂愁多上心澗水似鳴千古恨
墓門空鎖一庭陰穹碑短碣摩挲久舊草寒烟感慨深
青眼主人山共碧杖藜何日重登臨

與杜南谷

洞門長閉碧窓寒往事憑誰問計然可是主人偏避客
想應凡骨自難仙養生未悟黃庭景適口宜參玉板禪
檣燕岸花雖有意趁情且盍理歸鞭

呈田副使移治平江

三年心事付西湖門外遊塵一點無已報紫泥來北闕
暫移翠節過東吳城狐膽落秋霜凜枝鵲情深夜月孤
歌罷陽關重回首淡雲斜照落平蕪

送廉僉事

憲府清秋易地開天移明月過蘇臺行裝柏塞惟詩卷
祖帳殷勤付酒杯才大便應黃閣去政繁須待繡衣來
懸知別後相思處極目長空鴈影回

送楊飛卿按察歸建康

萬里關山半履痕
宦游增壯子長文
從來勁氣凌松栢
到處清吟入蓼芹
河水無情舟漸遠
津亭回首袂難分
相思總在闌干曲
漠漠江東日暮雲

次韻張郎中

學海年來得指歸
靜中觀物悟深幾
清風儘可伴明月
蒼狗從教變白衣
但守官常從落寞
稍知世味近依違
故人千里雲霄上
幾度孤燈夢欲飛

次韻完顏經歷

碧幢威望曉霜寒還是清朝耳目官憲府持將三尺在
儒家乞與一分寬竟傳錦綉珠璣富便作青黃黼黻看
傾蓋相逢苦不早更于何處覓詩壇

半年傲兀客羶寒多愧侏儒蠹縣官飲少獨憐書味好
愁多不覺帶圍寬從教蒼狗浮雲過留取黃花晚節看
但借餘光聊自佚終無夢想到登壇

題止得

五雲閣去舊題存審雨堂空幻境新又向夢中閒說夢

底須身外更求身
天高地下分已定
風靜波平見最真
何待覺來方有悟
園林鐘鼓總游塵

次韻光裔

為民那肯為身謀
歲月蹉跎志士羞
砌下有蟲還促織
眼前何草解忘憂
湖光收入千軍筆
世事催成兩鬢秋
但願豐年同一飽
巴歛正不減齊謳

黑白分明祇自勞
從渠鱗鳳與鴟鴞
相忘更覺人情好
聚首能令俗意消
油幙風流千載合
醉鄉物色四時饒

病夫瞻望門如海惟有心香趁水潮

送張元美

片帆風引去蓬萊收拾離愁付酒杯
翁季一門今契濶湖山十里重徘徊
北關古柳難為折東閣官梅自在開
莫遣書筒輕抵禁豈無公事可重來

次韻陳介軒

未老即懸神武冠政緣宦業欠清閒
曾觀滄海難為水豈為終南不出山
里社情親頻入夢江湖翼倦久知還

好風吹落珠璣句翰墨餘香到馬班

次韻廉平川送端硯

筆耕那復有豐年至寶橫陳古道邊但守剛腸經燥濕
斷無媚骨逐醲鮮深藏博得千金價餘潤分將一勺泉
明月夜光心目駭盍歸老手助雲烟

禹廟

像設森嚴冠百王高陵草木自蒼蒼身扶天地山川運
祠列君臣父子綱遺迹到今存寔石神功何事托梅梁

悠悠往古憑誰問冷落殘碑倚夕陽

馮副使招飲不赴

春風坐上笑吟邊兩度招要馬不前顧我生非肉食相
與君結得喜歡緣青山獨樂五畝地曲水蘭亭三月天
傍柳隨花無限意未妨暇日著輕鞭

次韻陳秋山

曾于滄海識靈鰲巨眼那能局小舠逸興孤標唐李白
高風雅量晉山濤功名我已辟三舍詩酒君當踵二豪

忙裡更思閒處樂早尋歸計最為高

送王治書

官業身謀不兩強朝陽鳴鳳見高岡風波平地丹心在
日月中天正氣昌江左岸花猶戀戀臺端古栢自蒼蒼
一翔一蟄雖云遠秋圃相期晚節香

寄張可與

好風詩卷寄郵音回記錢塘舊盍簪萬里友情經歲別
兩章性體大中吟鹽梅同味陽和徧桃李無言造化深

珍重昔人宗袞貴時留餘潤到山林

次韻方虛谷

市隱何嫌局趣駒閒中談笑儘鴻儒忽看尺素來雙鯉
絕勝銅盤引巨鱸有酒但教如北海無船亦可對西湖
辦香還祝斯文壽今有門人似此無

次韻蔡復齋

會蓋何時許辟堂晴欄照眼得篇章淵明有句緣親友
元子當年亦漫郎老我生涯在丘壑憑誰歌舞按伊涼

回頭喬木濃陰處拂子臨風語意長

次韻雪澗兄

囊錦翩翩豹霧文源流班馬有餘薰一枝爭似依全樹
大爵安知對此君自古熊魚難並得隔江鷄犬喜相聞
願言老去心還壯別岸香風入蓼芹

養蒙文集卷九

欽定四庫全書

養蒙文集卷十

元 張伯淳 撰

詞

木蘭花慢

題闕

載西山爽氣添不重月船輕記前度今朝瓊花爛漫管
領歌聲今歲濃華深處羨衮衣還看彩衣榮人世雲萍

相遇歲寒松栢長青
行行催覲朶雲明曉色上觚棱
看春去春來依然黃閣移近家庭浮雲儻來軒冕算古今
久遠是功名尚有寒崖枯卉東君也解留情

送李治書

羨高標雅量窓八面更玲瓏
每風日佳晴湖山清處抱
錦從容不把雲霄自隔向尊前看我嘯吟中人世流光
易老古來知己難逢
青驄來往太匆匆呵護有紗籠
想當道豺狼先聲到處膽落英風南樓暫容橫榻箕覽

觀有限興無窮別後相思何處心期付與飛鴻

壽張可與

對黃花爛漫能幾日又重陽問眼底湖山新春綠甚別
是風光三台近臨吳地映奎躔明處紫薇郎人道當年
豸角這回收斂秋霜笑談幕府畫偏長何事最為忙
但覺取一分一分方便亦足流芳人人敢攀宗袞為東
南民命秉心香更借南陽菊水殷勤滿注瑤觴

壽劉東崖

記當年客裏是今日奉霞觴任厨傳荒涼風林震撼
樂自難量別來歲華電走又都門剪袂幾星霜我半
百年已老兄多四歲偏強 玉堂滿袖惹天香鳳閣
樣詞章看采帖題春椒盤草頌蓬矢開張金甌御屏
簡記賦蓬萊壽域奏明光他年再逢今日伴兄綠野
尚羊

壽邵抑齋

儘江南江北誰不慕抑齋名羨夢草才華粲花談論喬

木佳聲重尋玉堂舊步喜今番天語重叮嚀云是儒家
領袖居然史筆權衡相逢便覺眼長青相對話羈情
正綠暗園林朱明時候瑞靄騰騰期公久長名節大羹
中還看五侯鯖此去明堂一柱當年玉樹階庭

壽陳介軒

問家傳舊物有清節與高風任野色充庭俗塵掃迹談
笑從容生涯但隨分足比孟嘗襟度只差窮曾是貞元
朝士本來湖海元龍且評推許介軒翁萬口一詞同

喜漸近希年從教白髮目炯雙瞳蟾鉤又還乍吐對荷
香莫放酒尊空砌下芝蘭競爽年年家慶圖中

贈彈琵琶者

愛長蘆年少將雅調寄幽情儘百喙春和羣喧夜寂老
鳳孤鳴都來四條弦裏有無窮舊譜與新聲寫出天然
律呂掃空眼底秦箏落紅天氣煖猶輕洗耳為渠聽
想闌塞風寒潯陽月色似醉還醒軒窓靜來偏好到曲
終懷抱轉分明相見今朝何處語溪乍雨初晴

次唐格齋韻

儘交游滿眼歲寒友果誰與羨錦綉為心冰霜作操仁
義蘧廬門前埽清俗軌自熙然甕牖與繩樞記我蓬弧
時候寓情翰墨歡娛驅車特地致函書高義渺江湖
悄夢斷鴛鴦盟深鷗鷺閒適從渠槐陰漸成翠幄看庭
前鷺過引新鷗歲歲期君一醉相忘非我非魚

滿江紅

壽張繡江

省闈彌綸早傳到和羹消息無限事但從綢領認教端的
回省平生游宦處那曾些箇由人力算知心惟有好
湖山秋澄碧從此去開壽域緣底事催行色傍重陽
時候且排瑤席何待殷勤斟菊水底須托興青松栢願
年年濃醖繡江波供詞筆

次韻壽澗允

七日新秋還又記生申初度清夢到小橋流水翔蓬深
處去歲灤京尤望遠今年談燕知誰與想荷飜翠蓋飽

涼颼時掀舞 何待吸擎盤露何必頌長明炬更何須
伊呂何須巢許但有金丹消息在待將銅狄摩挲去儘
西湖山水四時皆宜晴雨

臨江仙

壽程雪樓

白雪樓頭青晝永新來喜事連綿朱明綠暗麥秋天綉
衣何日去丹荔已香傳 前夜團團明月好清光留照
華筵錦囊隨處地行仙庭椿闕望眼同慶八千年

金定四庫全書
卷十
糖多令

壽王肯堂

前日是中秋
嬋娟為我留
畫圖間主勸賓
酌緊處偷閒
誰得似真意
度淡交游
薇省老叅謀
三召一舉頭
魯祥麟
增重儒流
今歲綵衣
還有伴
方袞袞
慶公侯

寄吳間間

移住近瀛洲
天槎去莫留
數歸期已過
中秋上界羣仙
官府足雲
不礙水長流
酒令與詩籌
依然記舊游
倚

斜陽分付羈愁應與鰲峯人共語還不減去年否

齊天樂

壽王伯起

庭柯一葉炎曦淡秋光宦情相侶駟馬爭馳千帆競送
不羨紛紛時輩隨緣祿賦慶官府清明紀綱興起暇日
吟鞍湖山公案更兼理將軍猶是未老舊時供奉曲
還有風致拄笏西山螭螭北海却是君家盛事佳辰雅
聚且滿引霞觴坐看芝砌富貴長年四時談笑裏

送馬德良

人生南北如岐路相逢自憐不早傾蓋班荆分燈並壁
吟卷筆床茶竈交情古道怕催詔翩翩好風吹到聚久
別離砌蛩那更碎懷抱臨行誰勸駐馬待將塵土事妨
我吟嘯小住雖佳還堪就否催得雲帆縹緲官梅正好
比前度孤山勝開多少兩處心旌倚樓同晚照

次韻謝勸翁

班荆傾蓋當時事回頭屢更寒暑倦翼才還蒼顏易得

零落江陵千樹相逢冷署且莫訝儒冠解將人誤記我
生朝采箋新調映紅炬投閒誰道太早人生行樂耳
何地非旅綠暗書眸紅生醉臉聊對簷花細雨移尊共
語問何日扁舟嫩荷香處坐待蟾光四更猶未吐

摸魚兒

次韻抱甕

采黃花自斟清醕南山人在何許浮生聚散雲萍似消
得幾番寒暑些箇路不斷情悰惟有春天樹停歌罷舞

更說甚悲歡從教白首心事付摧櫓 釣天夢忘却當年宦譜吟蛩休怨休訴如今世味更嘗慣但見青山多嫵清對苦是我誤儒冠還是儒冠誤西湖勝處且趣取佳時不寒不暖同泛小舟去

賀新郎

次韻

回首章臺路又一番春事闌珊滿簾風絮郭外誰家間院落別是壺天意趣判一日來游一度除却憂愁風雨

外肯容他野馬埋雙履行樂地更何處 人生忍把佳
期誤況今朝滿座春風怎禁不去蓮社蘭亭當日話便
合從今委付算此語非緣嬰譽飲少歡多還覺醉看歸
途疊嶂青無數情未足日催暮

婆羅門引

送徐容齋

容齋平日一身用舍繫安危兒童走卒皆知誰料鱸魚
江上忽憶故山薇任西風別酒月正圓時 性齋有詩

道掃舍待吾歸二老相招如此公論疇依人生行樂對
佳水佳山何必歸公笑曰歸去來兮

玉漏遲

壽張右丞

太平元夜好鰲山宴徹祥烟凝曉端正嬋娟為我玳筵
留照曾侍龍潛舊邸更欣際鴻圖初造人盡道兩宮柱
石元貞廊廟天轉右轄星躔儘向上勲名歷階須到
商鼎周彝時奏退朝吟嘯賸有頃簫韻雅況庭戶纖塵

如掃經濟了長醉遂初春早

壽馬右丞

浙江回棹處急流勇退冥鴻高舉出晝遲遲不為虎丘
留住姑待春和水漲旋乘個月明船去天未許雲歸又
出依然霖雨熟路小隊輕車想司馬重來聚觀如堵
暇日西湖點檢舊題詩句冷落江南倦翼但惟有心香
一縷長記取每歲仲春端午

柳梢青

賦枯梅寄張郎中馬同知

冷淡根芽小春時候兩蕊三花栽向西湖移來東閣一
任安排絕憐瘦影橫斜但宜在山顛水涯苑裏平安
嶺頭孤秀榮悴爭些



養蒙文集卷十